



Sud Bosne i Hercegovine
Суд Босне и Херцеговине

Broj: S1 3 IŽ 038641 20 IŽ
Sarajevo, 05.11.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Vesne Trifunović, kao predsjednika vijeća, Zvezdane Antonović i dr Branka Moraita, kao članova vijeća, odlučujući o žalbi T.H., ... B., izjavljenoj protiv odluke Centralne izborne komisije Bosne i Hercegovine, broj: 05-1-07-1-998/20 od 28.10.2020.godine, u nejavnoj sjednici, održanoj dana 05.11.2020.godine, donio je

R J E Š E N J E

Žalba se odbija

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020.godine, za ukupno 27960 birača po prijavama podnesenim do 01.09.2020.godine iz razloga što njegova prijava nije primljena do 01.09.2020.godine do 24,00 sata.

Protiv ove odluke žalitelj je izjavio žalbu navodeći da se ne nalazi na spisku iako se prijavio za glasanje u ... u B., te da ne zna koji je razlog tome.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH odbila žalitelju T. H. upis u izvod iz Centralnog biračkog spiska za glasanje izvan BiH iz razloga što njegova prijava nije primljena u CIK BiH do roka koji je CIK utvrdila nakon raspisivanja Lokalnih izbora 2020.godine, tj, nije stigla do 01.09.2020.godine do 24,00 sata.

U konkretnom slučaju žalitelj u žalbi ističe da je poslao prijavu za glasanje izvan BiH, međutim prema stanju spisa ista prijava je zaprimljena kod CIK BiH dana

03.09.2020.godine, dakle nakon proteka roka koji je CIK BiH odredila u skladu sa članom 3.15 stav 1. Izbornog zakona BiH, a koji je bio 01.09.2020.godine.

Stoga, prijava koja stigne nakon utvrđenog roka, prema shvatanju apelacionog vijeća se smatra neblagovremenom.

Odredba člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), propisuje da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spisaka dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže idokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Odredbom člana 3.16 stav 2. Izbornog zakona BiH propisano je da ako državljanin iz člana 3.15 stav 1. ovog zakona podnese prijavu prije isteka roka utvrđenog za podnošenje prijave za glasanje izvan BiH na slijedećim izborima, nalazit će se u izvodu iz Centralnog biračkog spiska za glasanje na odgovarajućem biračkom mjestu u osnovnoj izbornoj jedinici u kojoj ima prebivalište.

Žalitelju nije oduzeto biračko pravo za Lokalne izbore 2020.godine, nego samo mogućnost da glasa putem pošte izvan BiH na ovim izborima. Isti će moći glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Predsjednik vijeća
S u d i j a
Vesna Trifunović